

欽定中樞政考

欽定中樞政考目錄卷之二十二

綠營

巡洋

江海會哨

會哨展限

海洋巡哨

山東洋面巡哨

登州水師巡查海島

江南山東洋面分界

嚴禁巡洋官兵不得退縮

依限修造戰船實力巡洋

大員不親身巡洋

水師人員不准代巡

巡洋水師人員代巡處分

代巡千把總照本例議處

海洋失事

海洋連劫

海洋接緝

徇縱廢鐵出境

商販與蒙古貿易

朝鮮人私帶禁物

朝鮮人貿易私賣禁物

私越朝鮮

停禁洋船運帶硫磺入口

太監出口給票

汎渡弁兵稽察逃人

塔爾巴哈臺緝拏逃入功過

失察賊犯偷越卡倫

逃犯私越卡倫

巡查寧夏所屬地方

巡查參山

查緝恩參停派侍郎

搜獲參珠

營員押送商船出洋

稽查小羊山無照民人

稽查海島居民搭寮

稽查海島居民漁戶

山東海島居民

浙江海島居民

外海捕盜著績給與軍功加級紀錄

拏獲海洋盜犯分別議敘

水師官員拏獲盜犯抵銷本任承緝處分

水師官員緝獲盜犯議敘

巡哨官員獲犯議敘

水師官員停止開復

江海會哨

一江南江西沿江各營汛巡船上下往來巡緝  
每月彼此會哨二次對換概將令箭爲憑將  
會哨日期報明總督巡撫提督總兵官查考  
分巡之上再設總巡狼山鎮每月派將備二  
員駕沙船二隻東巡至廖角嘴西巡至京口  
京口官兵東巡至狼山西巡至江寧江寧將  
軍派官兵東巡至京口江南總督派將備或  
候補官一員駕將軍標船一隻西巡至安慶



安徽巡撫每月派將備駕船二隻東巡至江  
寧西巡至江西交界江西九江鎮總兵官南  
昌副將每月各派官一員巡至江南交界九  
江營派官一員巡至湖廣交界所到日期俱  
報明總督巡撫提督總兵官互相查考倘不  
按期接界會巡該管官詳揭該總督巡撫提  
督總兵題叅將派出巡哨官并失察之提督  
總兵均照例分別議處

例載處分則  
巡洋門兵丁責

革總督巡撫交吏部議處

一廣東省沿海各鎮協營總巡三月初十日碣  
石鎮巡至深澳與南澳鎮會印通報陽江鎮  
與春江協副將會哨於廣海大澳海安營遊  
擊與海口營叅將會哨於白沙仍巡回本路  
龍門與龍門協副將會印通報係本路地方  
毋庸定以日期五月初十日碣石鎮與陽江  
鎮會哨於平海大星澳春江協副將與海安  
營遊擊會哨於碣洲八月初十日澄海協副  
將與香山協副將會哨於平海大星澳碣洲

營都司與吳川營都司會哨於廣州灣十月  
初十日南澳鎮與澄海協副將會哨於萊蕪  
香山協副將與吳川營都司會哨於廣海大  
澳龍門協副將與海口營叅將會哨於白沙  
其總巡以及各營分巡定期會哨立法稽察  
之處悉照福建浙江之例行

一福建浙江各鎮總巡洋面福建海壇鎮於四  
月初一日八月初一日與金門鎮會哨於滿  
頭港六月十五日與福寧鎮齊抵北茭洋面

會哨福寧鎮於五月十五日與浙江溫州鎮  
會哨於鎮下關福建金門鎮於六月十五日  
與南澳鎮會哨於銅山大澳浙江定海鎮於  
五月十五日與江南崇明鎮會哨於大洋山  
三月十五日九月十五日與黃巖鎮會哨於  
九龍港黃巖鎮於三月初一日九月初一日  
與溫州鎮會哨於沙角山各鎮會哨之期責  
成該管各巡道豫赴會哨處以俟兩鎮到齊  
後當面取結具報如各鎮玩視偷安並不親

金史卷一百一十五 兵志二  
赴會哨該道立即據實揭叅倘該道有託故  
不親身前往或通同捏飾者一併叅辦其沿  
江各營每月於界址分巡仍於上下接界會  
哨卽令鎮臣差弁取結通報如有違誤捏飾  
卽行揭叅倘鎮臣徇隱失察一併叅處

會哨展限

乾隆五十四年十月內奉

上諭海洋會哨立法綦嚴該鎮將等訂期會巡洋面本  
有一定章程原不得因偶遇風信觀望不進前因護  
溫州鎮李定國巡洋會哨因風大難行停泊小門洋  
自應據實報明乃既未經前往沙角山會哨復捏敘  
會哨印文繞道賁投朦混捏飾是以發往伊犁以示  
懲儆但念巡洋會哨非出兵打仗機不容緩者可比  
若屆期遇有颶風陡發該鎮將等因恐遲逾程限身

獲重譴輒冒險放洋前進使專閫之員及將弁兵丁  
審試於暴風巨浪之中國家政體亦不忍出此嗣後  
各該鎮定期會哨如實有風大難行許其據實報明  
督撫並令該鎮等彼此先行知會卽或洋面風大雖  
小船亦不能行走不妨遣弁由陸路繞道札知以便  
訂期展限再行前往但該督撫等務須詳加查察設  
有藉詞捏飾卽應嚴叅治罪若果係爲風所阻方准  
改展日期以示體恤而崇實政前聞閩省海洋每遇  
九月颶風較多而江南浙江廣東海洋風信大畧相

司曾經降旨令該督撫按照各處洋面風信平順之時另行會商酌定月分不必拘定三月九月會哨旋據伍拉納等覆奏海壇金門二鎮每年三九兩月於酒頭港會哨之期因其時風信靡常並多海霧改爲四八兩月已如議准行嗣後自必遵照定例不致冒險今復格外加恩若該鎮將等恃有此恩旨遂爾意存託故遲延或藉詞耽逸致誤巡洋要務一經查察必照李定國之例治罪若該督撫並不留心察訪據該鎮等捏詞稟報扶同徇隱亦必一併治罪



能稍爲寬貸也將此通諭知之欽此

一各省海洋會哨週定期特倘有風大難行  
該提鎮等選定日期應行會哨仍將會哨日  
期報部查覆不准擅改書完日期冒險失事

海洋巡哨

江南省巡洋官兵以三個月爲一班  
巡洋官兵以六個月爲一班每年分爲上下  
兩班福建省巡洋官兵每年自二月起至五  
月止爲上班六月起至九月止爲下班十月  
起至次年正月按雙單月輪班巡哨浙江  
巡洋官兵每年二月至九月以兩個月爲一  
班十月至次年正月以一個月爲一班山東  
登州水師每年於三月內出洋巡哨於九月

內回哨各省水師俱令總兵統率將備弁兵親身出洋巡哨遇有失事分晰開叅照例

處

例載處分別  
例巡洋門

拏獲盜案抵銷本任承緝案件

一水師旗員任內有承緝洋盜未獲案件應得處分如能於鄰境失事未經拏獲之案及本轄洋汛從前失事未獲之案將盜案全獲或拏獲及半一案無論人數多寡均准其抵銷本任承緝一案處分若所獲之犯不能灼知其爲鄰境本汛以及全獲獲半者卽以獲犯多寡定其功績等差拏獲盜犯十名者准其抵銷本任承緝一案處分二十名者准其抵

銷本係承緝二案處分再有多者以次遞加  
若本身並無承緝盜犯能獲鄰境盜犯一案  
者准其送部引

見如拏獲鄰境盜犯未能及半祇准按名議敘不准  
送部引

見倘有捏報拏獲及以少爲多報部請抵別經發覺  
將本員叅革提問咨報之將軍等按其知情

失察照例分別議處

例載處分則  
例巡洋門

登州水師巡查海島

一山東隍城島至直隸交界武定營等處併成  
山八家口至江南交界安東營等處令登州  
總兵官撥水師營官兵巡查其隍城島與  
盛京之鐵山中間相隔一百八十餘里其中並無  
泊船之所自鐵山起九十里之內令

盛京官兵巡哨自隍城島起九十里之內令山東  
官兵巡哨如遇失事量其境界相近詳查議  
處

江南山東洋面分界

一江南山東交界洋面有大沙從江南鹽城縣起橫亘千里直抵北洋其沙尖與鶯遊山相對沙尖以南屬江南沙尖以北屬山東卽以鶯遊山爲界如遇失事一據事主具報卽日飛關隣汛確實查勘被盜界址係何省營汛所轄卽責成該管員弁上緊緝拏按限叅處如有推諉及指使捏報他界者該督撫等據

實查叅照例議處

例載處分則  
例巡洋門

嚴禁巡洋官兵不得遲縮

乾隆五十六年正月內奉

上諭福崧等奏審擬千總袁鳳鳴等在洋遇盜搶去軍械並護副將王愈安等捏詞具報一摺袁鳳鳴帶兵出洋巡緝遇見盜船正應奮力擒拏督率兵丁等向前追捕乃轉被盜匪過船將該弁擒住搶去軍械衣物且該弁亦並未身受一傷實屬懦弱不堪該撫等比照領兵官失誤軍機之例擬以斬候尙不足以示懲袁鳳鳴應照臨陣脫逃律著卽處斬餘俱照該撫



等所奏完結又據奏查明遊擊錢夢虎在淡水洋面  
瞥見盜船卽首先出抵脚踢兩賊落水又拔刀連砍  
數匪嗣因盜匪拚命抗拒致被重傷倒地等語錢夢  
虎一見盜艘卽能迅速追拏迨至賊船駛攏抵死拒  
捕該遊擊親身直前抵禦奮勇格殺盜匪多名身受  
重傷覈其情節勝袁鳳鳴畏縮無能者多矣錢夢虎  
著免其治罪仍同遊擊之任所有在船兵丁亦著照  
舊歸伍食糧朕向來辦理軍務信賞必罰功罪輕重  
惟其自取該弁兵丁巡緝海洋遇盜匪持械拒捕卽

與臨陣無異豈可心存畏葸懼怯不前今袁鳳鳴出  
洋捕盜反被盜匪掇倒船艙如此無用竟不成爲武  
弁是以將袁鳳鳴立置重典錢夢虎雖被盜格傷而  
其奮身追捕殺斃匪犯多人在營員中尙屬認真緝  
捕是以仍令其照舊供職嗣後各水師營員弁日俱  
當知所勸懲遇有出洋巡緝之事毋得稍有退縮致  
干重罪也著該督詳諭各提鎮兵丁知之該部知道  
福崧等摺併發欽此

依限修造戰船實力巡洋

嘉慶二十二年九月內奉

上諭御史熊墀奏請嚴飭修造戰船實力巡洋一摺山東膠萊海口額設戰船遇有虧朽應按年限修造至巡哨員弁亦應親身出洋認真巡緝今該御史奏該處戰船竟有停廠十餘年或七八年不行修造完竣營員雇船應用其例應出巡之副將叅遊等並不出洋僅委千把微弁虛應故事均屬廢弛著陳預嚴飭廠員將應修各船依限修造工竣覈實驗收並通飭

巡哨各營員務按期親身出洋巡緝如有推諉捏報者嚴行叅處以重海防欽此

大員不親身巡洋

一總兵官不親身山洋監督官兵巡哨副將以下等官不親身出洋巡哨者該總督總兵叅揭各照例議處總督提督總兵不據實揭叅提督總兵均照徇庇例議處

例載處分則總例巡洋門

督巡撫交吏部覈議

水師人員不准代巡

嘉慶五年二月內奉

上諭各省沿海水師向例設有統巡總巡分巡及專汛各員出洋巡哨近因各省奉行日久漸有代巡之弊卽如統巡一官係總兵專責今則或以叅將遊擊代之甚至以千總把總外委及頭目兵丁等遞相代巡遇有叅案到部則又聲明代巡之員希圖照離任官例罰俸完結殊非慎重海疆之道著通諭沿海省分各督撫嗣後均令總兵爲統巡以副叅遊擊爲總巡

以都司守備爲分巡備總兵遇有事故祇准副將代  
巡或副將亦有事故准令叅將代巡不得以千把外  
委等濫行代替以杜借端規避之弊至山東水師向  
不叅送統巡疎防職名殊未允協嗣後該省亦應一  
律遵辦以昭畫一此次通諭之後各督撫等務令水  
師各員親身出洋梭織巡查以期綏靖海洋倘敢仍  
前代替藉端推諉一經部臣查出或被科道糾參則  
惟各該督撫是問將此通諭知之欽此

巡洋水師人員代巡處分

一各省水師人員按季巡洋應照新定章程輪派不得濫行代替無論何省總以總兵爲統巡親身出洋督率將備巡哨以副將叅將遊擊爲總巡都司守備爲分巡倘總兵遇有緊要事故不能親身出洋祇准以副將代統巡副將遇有事故偶以叅將代之不得援以爲常其餘遊擊都司均不准代總兵爲統巡都司守備不准代副叅遊擊爲總巡千總把總



不准代都守爲分巡目兵不准代千把外委  
爲專汛派員出洋責令統巡總兵專司其事  
按季輪派一面造冊送部一面移送督撫提  
督查覈如於造冊報部後原派之員遇有事  
故不能出洋應行派員更換者亦卽隨時報  
明出具印甘各結倘有越級委派代替無故  
更換者該總督巡撫提督據實查叅將統巡  
總兵照例議處如總督巡撫提督不據實查  
叅率行轉報題咨者將提督照例議處

例載  
處分

則例巡總督巡撫交吏部覈議倘本官畏怯  
洋門門巡總督巡撫託病私行轉委所屬員  
風波不肯出洋臨期託病私行轉委所屬員  
弁代替經總督提督總兵查出揭參者將本  
官叅革提問

一巡洋官員由統巡總兵按季照例輪派務於  
應屆出洋之前先期派定並將職名一面具  
文造冊送部一面移送督撫提督查覈並將  
具呈報部日期填明春季不得逾正月夏季  
不得逾四月秋季不得逾七月冬季不得逾

斗月如呈送遲延按其違限月日分別議處

例載處分則  
例巡洋門

代巡千把總照本例議處

一海洋巡哨如遇失事有以千總把總作統巡總巡開叅者除將千總把總照專汛本例議處外並查取錯行派委之該管上司職名送部將總兵及不據實查叅之提督照例分別議處

例載處分則  
例巡洋門

總督巡撫交吏部議處

一海洋失事該督撫開叅職名時查明失事地方界址該員巡緝地面覈實開叅如有統巡而無總巡或有分巡而無隨巡委巡者准其

疏內聲明或正任官遇有事故按照官階遞  
行委派代理若有以干把總作爲總巡分巡  
並一人而兼四五任者照例議處

例載處分  
則例巡洋

門

海洋失事

一福建浙江江南廣東山東海洋按期輪派官兵巡哨若行船被劫毋論內外洋面限滿不獲將專汛兼轄分巡外委各員及委巡隨巡與統轄總巡統巡各官分別參限照例議處

例載處分則  
例巡洋門

海洋連劫

一內外洋面事主貨船如有同日在一處連次  
被劫二三隻者無論是否一案盜夥三個月  
限滿不獲將分巡委巡隨巡專汛兼轄統巡  
統轄總巡各官均照例分別議處例載處分則例巡洋  
門若能於限內獲盜過半兼獲盜首者免其  
議處

海洋接緝

一海洋接緝盜案之員如限內不獲按計巡哨

年月分別照例覈議

例載處分則  
例巡洋門

如接緝限

內但能獲賊雖不及半均免其處分若能拏

獲過半者紀錄二次全獲者紀錄三次若賊

夥止二三名者接緝官於限內拏獲一半兼

獲盜首及拏獲過半者於免議之外仍紀錄

二次其拏獲一半盜首未獲者止免其議處

毋庸議敘



洋面失事隱諱

一官員出洋巡哨遇有洋面失事隱諱不報或  
實被強劫捏報搶竊者將武職專汛官各照  
例分別議處兼轄統轄官均分別知情失察  
各照例駁議例載處分則  
例巡洋門倘屬員諱匿未經  
告發該管上司能查出揭叅者仍照洋面失  
事本例議處

洋面失事會勘遲延

一洋面失事事主於何營呈報該管官船遲延  
會連界之汛帶領事主赴洋會勘定爲何州  
縣營汛所轄立即稟報統巡官轉詳總督巡  
撫提督一面行查海關各口將稅簿賊單數  
覈呈驗一面卽雇飭水師各營勒限緝拿一  
俟疎防限滿卽將會否獲賊開具職名題參  
如藉詞耽延並不赴洋速行查勘依限呈報  
致題參疎防逾限半年以上者查係守口官

弁耽延或係巡洋員弁耽延或係統巡官轉  
報職名及總督巡撫題叅遲延者均各照例  
分別議處

例載處分則  
例巡洋門

總督巡撫交吏部議

議

一 關口員弁於文檄未至之先拏獲匪船者照  
拏獲隣境首盜之例加一級如已奉到文檄  
能據實查出將盜犯拏獲者免其盤查不置  
處分

水師官員按時操演

嘉慶二年正月內奉

上諭據吉慶奏校閱各標營官兵一摺內稱現值冬深  
閱兵之期查閱內河水師弁兵駕駛便利在船施放  
鎗礮尙屬熟練鳧水爬桅亦屬嫺習等語此語不通  
粵東氣候雖屬和暖但水性寒冷且正屆隆冬之時  
令人赤身下水究未免不近人情官兵等若遇追捕  
洋盜卽赴水擒捉亦分所當然至於尋常操演自應  
按時練習卽各該督所奏駕駛兵船施放鎗礮及爬

桅等技藉以操習武備則可至於鳧水一節行之冬令殊無此理該督等若故令兵丁等冒寒入水固覺太不體恤倘並無其事僅以一奏塞責尤屬具文非是嗣後沿海地方如尋常操演爬桅等技藝仍照常演習外至冬令鳧水斷不可行以示朕體恤水師準情酌理之意將此通諭有水師省各督撫知之欽此

配駕戰船兵額

一船隻配載官兵出洋巡哨俱令照向定兵丁額數配駕倘出洋時不如額配足以致船隻不能管駕遭風擊碎者將派撥之員與失於稽查之總巡及總兵各官均照例分別議處

例載處分則其船隻著落巡哨各員賠造  
例巡洋門

選派巡洋不慎官員議處

一水師各營配兵出洋務須慎選明幹弁兵實力巡哨並將原派將備銜名先報督撫存案倘該弁兵等在洋遇有匪船退縮不前轉破盜劫該督撫等查明卽將本船弁兵嚴行治罪原派之將備叅奏革職仍令自備資斧在於洋面効力三年方准回籍該總巡總兵照例議處

例載處分則  
巡洋門

巡洋員弁協捕不力

一隣境盜匪被官兵追緝到汛在洋巡緝之員未能協同拏獲致被別汛獲犯供出追捕地方並經由月日將該汛未能協捕之巡洋各員弁並總巡上司均照例分別議處

例載巡洋員弁並總巡上司均照例分別議處

巡洋門



署事官員輪巡失事

一各省水師署任人員輪派出洋巡哨遇有失  
事如在疎防限內撤巡并卸委署之任者照  
離任官例議結如已經撤巡而署任尙未交  
卸者仍照承緝官例議處

盤查海船

海洋中形迹可疑之船已被巡洋員弁盤獲如貨物人數不符稅單牌票者限三日內查明如係賊船交與地方官治罪果係商船卽速放行將放行之處仍申報該上司存案如以賊船作爲商船釋放或以商船作爲賊船故意稽遲擾害者均照例議處索取財物者叅革提問該上司查出題叅者免議如巡洋員弁擅放賊船並擾害商船上司失察者均

照例分別議處  
例載處分則  
例海禁門

查驗山東海船

一山東外洋商船照該省驗單查對外其登州  
萊州二府民人前往奉天貿易及奉天等處  
民人有過海者商人船隻出口進口該州縣  
俱給與印單將客人姓名貨物名單賣貨地  
方同船戶水手姓名一一開載守口官掛號  
驗單放行若兵役有勒索情弊守口官失察  
者照例議處如有流民私往奉天偷渡出口  
將失察之守口武弁亦照例議處

則載處分  
則例海禁

稽查海洋貿易

一 直隸山東江甯浙江福建廣東等省民人許  
令海上貿易捕魚其東洋南洋准令福建廣  
東江甯浙江商民前往貿易各於沿海州縣  
給領照票填明籍貫年貌係往何處貿易於  
出口入口之時呈明守口官查驗

稽查商船出入

一 出海洋貿易商船許用雙桅梁頭不得過一丈八尺如所報梁頭一丈八尺而連兩舷水溝統算果有三丈寬者許用舵水八十人梁頭一丈六七尺而連兩舷水溝統算果有二丈七八尺者許用舵水七十人梁頭一丈四五尺而連兩舷水溝統算果有二丈五六尺者許用舵水六十人初造船時報明海關監督并地方官該地方官取供嚴查確係殷實

良民取具澳里甲族各長并隣佑當堂畫押  
保結然後准其成造造完時地方官親驗梁  
頭並無過限舵水並無多帶取具船主不得  
租與匪人甘結將船身烙號刊名然後給照  
照內將在船之人年貌籍貫分晰填明及船  
戶攬載開放時海關監督將原報船隻丈尺  
親驗明白取具舵水連環互結客商必帶有  
黃水貨物水手必查有家口來歷方許在船  
監督驗明之後卽發船隻丈尺客商姓名人

數併載貨前往某處情由及開行日期填入  
所給船單內於出口之處將船照呈守口官  
驗明掛號填註出口月日驗船放行造冊具  
報總督巡撫於每年四月內造冊報部同時  
於入口處比號守口官報明總督巡撫銷號  
於每年九月內造冊報部其在沿海各省貿  
易之船於出口時將船照呈守口官驗明掛  
號於經過要汛掛號入口之處將船照呈送  
彼處守口官驗明回棹日從原處覆驗掛號



而回如舵水人等越數多帶或詭名頂替  
官失于盤查以致夾帶奸匪入口或受賄者  
或並無夾帶違禁情事汛口員弁藉端勒索  
或失察兵役勒索各照例分別議處治罪  
處分則例自行查出究辦者免議  
海禁門

一商民往販外洋或人回而船不回大船出而  
小船回及出口人多而進口人少該總督巡  
撫嚴加查訊果係審賑未清俟來年六七月  
間乘風駕回及遇風飄往別省者船戶取具

飄泊處所地方官印結齋回查驗遭風覆溺者若有餘存飄回之人及同行隣船客商水手等卽訊取確供甘結再加地方官印結報明均於回港冊內聲明報部免其叅究倘留番清賬之船來年仍不回港并捏報遭風飄溺等弊並無飄泊地方官印結及餘存飄回之人隣船客商水手等確供該總督巡撫嚴加查訊治罪原出結地方官交吏部議處

一出洋小本商民因風信屆期不能奔回本籍

地方官給照在福建者呈明廈防廳在廣東者呈明南海縣在浙江者呈明乍浦海防同知及海關監督俱取其行戶船主保結給與印照前往該海關廳縣將給照緣由行知該商地方官備案商民回棹之日仍各赴領照衙門繳銷如該船舵水貨客有在番地賬目不清及別項事故原給照衙門取具同行鄰船客商水手甘結移行地方官存案俟回日報銷其出洋商船於出口之際舵水遇有事

故該船戶就近招募本分水手取具保結赴  
該海關廳縣批發執照准其頂補

稽查漁船出入

一福建漁船之桅聽其用雙用單各省漁船止許單桅其梁頭均不得過一丈舵水不得過二十人廣東漁船梁頭不得過五尺水手不得過五人取魚俱不許越出本省境界欲造船者先具呈該州縣查取澳里甲族各長隣佑保結方許成造造完之日該州縣親驗明白印烙字號然後給照照內將船主年貌姓名籍貫及作何生業開填入照欲出洋者將

十船編爲一甲取其一船爲匪餘船並坐連  
環保結並將船結字號於大小桅篷及船旁  
大書深刻仍於照後多留餘紙俟出口時卽  
責成守口員弁將該漁船前往何處並在船  
舵水年貌的實姓名籍貫逐一查填入照鈐  
蓋印戳并將所填人數照登號簿准其出口  
入口如查與失實及失於盤查或受賄者或  
藉端勒索照例分別議處治罪并責成沿海  
關口委員兼司查辦知失失者重懲無違

出濫入亦照例覈議受賄者照守口員弁之  
例辦理若兵役有勒索情弊失察之守口員  
弁照失察勒索商船之例議處例載處分則  
例海禁門  
其呈報船隻遭風者查明人夥有無落水受  
傷訊明實據方准銷號若船主在籍而船隻  
出洋有事惟本主是問

一沿海一應採捕及內河通海之各色小艇並  
新造小艇與採捕售賣者俱報明地方官取  
澳甲隣佑保結印烙編號給照遇晚停泊人

家塘汛之處倘船隻被賊押坐出洋卽報明  
地方官將船號姓名移咨營汛緝究和船之  
人必報明本處澳甲出結報官存案出口入  
口汛口官員掛號稽察或風信不齊進口愆  
期者取具結狀備案如有失於盤查及需索  
勒指受賄均照漁船出入例處分

例載處分  
則例海禁

門

一福建商船每於漁期欲出海捕魚者赴地方  
官呈明換領漁照取具澳甲戶族隣佑保結



連環互結准其入海採捕俟漁期  
過後將漁照繳銷換給商船印照該地方官  
將換領商船印照緣由彙報該上司存查如  
過期不歸卽嚴查究訊治罪永不許出海捕  
魚

稽查商漁船隻桅篷

一出海商漁船隻自船頭起至鹿耳梁頭止並  
大桅上截一半各照省分油漆飾船頭兩舷刊  
刻某省某州某縣某字某號字樣福建船用  
綠油漆飾紅色鈎字浙江船用白油漆飾綠  
色鈎字廣東船用紅油漆飾青色鈎字江南  
船用青油漆飾白色鈎字其篷上大書州縣  
船戶姓名每字俱徑尺藍布篷用石灰細麵  
以桐油調寫箴篷白布篷用濃墨書寫黑油

分抹字上不許模糊縮小如遇剝落卽行填  
寫油飾沿海汛口官員及出洋舟師實力稽  
察凡商漁船隻驗有照依各本省油飾刊刻  
編號者卽係民船准其放行如無油飾刊刻  
編號及將字樣塗改刻削情弊卽係匪船拘  
留究訊若沿海汛口官員怠惰偷安不行稽  
察以致在洋肆劫者照例議處兼轄統轄及  
提督總兵各官徇隱不揭或失察者亦照例  
分別議處

例載處分則  
海禁門

總督交吏部查議

一往販外洋商船頭巾插花並所豎桅尖准其帶用其內洋商漁船隻將頭巾插花並所豎桅尖槩行禁止如有私帶出口守口官失於查出者照例議處

例載處分別  
例海禁門

商船呈繳礮位

一 出洋商船如有在外國置買礮位防禦盜賊者進口之時卽開明銅鐵礮位斤重數目告知守口員弁前赴有司衙門呈繳地方官存驗輕重酌給價值存貯局庫其中有可備用者發給礮位較少之營分以供操防如不堪應用卽將銅鐵斤重數目移知就近營汛遇有製造軍械之時領取應用仍由總督巡撫於每年年底將一年內商船進口有無呈繳

職位及呈繳若干給價若干查明彙報戶部

兵部稽查

稽查商漁船夾帶禁物

一出口商船并採捕魚船俱不許攜帶鎗礮等器械如有夾帶硝磺釘鐵軍火器械樟板等物接濟奸匪者守口官弁失於盤查或有賄縱情弊照例分別定議

例載處分別自行盤  
查海禁門

獲究辦者免議

一出版東洋南洋之大船准其攜帶軍器每船礮不得過二位鳥鎗不得過八桿腰刀不得過十把弓箭不得過十副火藥不得過三十

斤造礮烏鎗時該船戶呈明地方官給與照  
票赴官局製造完日地方官親驗整鑿姓名  
號數其腰刀弓箭火藥等項同牙行置造完  
日報官查點俱於船照內將礮位輕重大小  
烏鎗火藥腰刀弓箭數目分晰填明以備海  
關監督并口岸文武員弁盤驗稽察回棹口  
還原帶軍器數目逐一查點將礮貯官庫俟  
開船之日再行給還如有買外夷銅礮帶回  
者地方官給與時價以充鼓鑄之用倘有船



隻遭風打破軍器沉失者該船戶客商出具  
甘結於所在地方官報明免其治罪如船隻  
無恙妄稱沉失該總督巡撫嚴加究訊照接  
濟外洋例治罪守口官稽查不實俱照例議

處

例載處分則  
例海禁門

一外洋行走之船動經數月所有鐵釘油灰棕  
絲黃麻等物酌量攜帶亦於船照內填明數  
目以備查驗如有動用同船之人出具甘結  
同棹日送地方官稽察若有借端多帶者仍

照夾帶違禁貨物例治罪守口官稽查不實

俱照例議處例載處分則  
例海禁門

一外洋商船人等私帶礙位進口地方官失於

查繳及守口員弁查出礙位不卽令其呈繳

者均照例分別議處例載處分則  
例海禁門

一商販出洋貿易如有私將銅斤鐵斤並銅鐵

器攜帶貨賣圖利者按照斤數分別首從治

罪貨物銅斤船隻入官外其關汛武職員弁

知情賄縱或失察者均照例分別議處治罪

例載處分則 自行盤獲者免議  
例海禁門

一漁船出口入口如有裝載貨物接渡人口者

雖無夾帶禁物奸民情弊汛口官失於查禁

者照例議處

例載處分則  
例海禁門

一出洋樵採船隻每船帶食鍋一口所攜斧斤

每名止許一把在船人數不得過十名俱於

照內註明出口入口汛口官均行查驗若越

數夾帶出口及進口缺少者未經查明之汛

口官照例議處

例載處分則  
例海禁門

商漁船隻出口入口查驗米糧

嘉慶十四年七月內奉

上諭御史潘恭辰奏請嚴查販米出洋一摺米石出洋  
例禁綦嚴節次降旨諭令各督撫等於沿海口岸實  
力稽察以杜偷漏乃積習因循仍不免視爲具文卽  
如浙江省本年並無水旱偏災所產米穀自足供闕  
閭粒食市價亦應平賤乃甚爲昂貴自係入市者少  
出海者多以致民食不能充裕可見地方官平日嚴  
斷接濟竟屬紙上空談浙省如此他省可知試思各

口岸如果食米不放出洋則盜匪日形困乏何以現在浙閩粵三省盜船尙多猶煩兵力剿捕且各衙門不肖胥吏兵役爲之護庇通同濟匪得受陋規甚至有食海俸名目而各海關所用之人又多係官親長隨牟利執法其縱容包庇者正復不少不可不嚴行飭禁用杜弊端著各省督撫及管理海關大員一體嚴密留心實力查察將前項弊端剔除淨盡務使盜源禁絕民食日充以期海洋寧謐地方豐裕設經此次嚴諭之後仍不過陽奉陰違仍致偷漏朕惟執法

從事恐該督撫等不能當此重咎也將此通諭知之  
欽此

一往販外番船隻各按船之大小地方產米之  
多寡帶米回內地暹羅大船帶米三百石中  
船帶米二百石咖喇吧大船帶米二百五十  
石中船帶米二百石呂宋東境蘇馬辰柔佛  
四處大船各帶米二百石中船各帶米一百  
石埤仔六坤越南宋厝勝丁家廣甯蘇祿  
七處中船各帶米一百石於入口時將米石

數目確查除米石多餘一併造報查覈外如  
米石不足原數嚴訊若有偷漏情由照接濟  
外洋例治罪

一商漁船隻各按海道遠近人數多寡每人每  
日帶食米一升之外並帶餘米一升以防風  
信阻滯若有多帶米穀以及麥豆雜糧卽係  
偷運汎口呂弁如有隱匿賄縱情弊照例分  
別定議若並無隱匿賄縱情弊止於失察者  
按米穀多寡分別議處如以米穀麥豆及一

切應用物件接濟奸匪者後經發覺無論石  
數多寡將守口官弁照例議處如不經由海  
口從沿海偷運接濟者將守口官並巡海

職均照例處分

例載處分則  
例海禁四



沿海有底無蓋剝船一體編號給照

一沿海有底無蓋剝船一體報官驗烙編號給照責成守口員弁將該船舵水年貌姓名籍貫查填入照鈐蓋印戳登號准其出口入口如失于盤查以致夾帶奸匪出入或並無夾帶違禁情事汛口員弁藉端勒捐以及兵役勒索守口官失察者各照例分別議處

則例海禁門自行查出究辦者免議

營員擅給船照

一商漁船隻給照係州縣專責如營員擅給牌照及借牌照爲匪者將擅給牌照營員照例

分別議處

例載處分則  
例海禁門

營員押送商船出洋

一福建洋船掛驗出口之時該汛營員知會廈門巡檢詳細驗明押交汛弁轉送至浯嶼汛仍一體撥船押赴東槌以外洋面俟其乘風放洋後方許回汛廣東洋船掛驗出口之時陽江鎮標左營撥繫船送至順德交替順德協卽撥船押出外洋洋面俟其乘風放洋後方許回汛

稽查小羊山無照民人

一江南小羊山地方如有赴山傭工貿易者地方官給與印票守口員弁稽查驗放仍令巡洋及守口員弁嚴行稽察如有無照民人偷漏赴山者將疎漏之守口員弁並巡山員弁均按其名數多寡照例分別議處

例載處分則例海禁

門

稽查海島居民搭寮

乾隆五十五年九月內奉

上諭據伍拉納奏福建所屬海島四百五十七處浙江所屬海島五百六十一處多有民人居住有搭蓋寮房零星散處者有建蓋瓦房已編保甲者有魚映時暫行搭厰者自應遵照定議悉行燒燬惟是烟戶稠密之處若概行驅逐使謀生之民一朝失業轉致流爲匪請將編甲輸糧者免其驅逐倘有匪徒竄入立即擒縛解官辦理其餘或零星散處或本係封禁

之地將所搭寮房燒燬人口遞籍安插至各處漁戶  
駕船出洋暫搭寮廠未便概行禁阻應令地方官取  
結給照認真稽查等語前因顧學瀚奏稱沿海各省  
所屬島嶼多有內地民人建蓋草寮房屋居住日聚  
日多誠恐相聚爲匪查察難周令各該督撫查明海  
島情形如有匪徒潛搭草寮房屋居住者立即燒燬  
今據伍拉納查奏浙閩兩省海島居民甚多已成禁  
肆不便概行焚燬驅逐所奏是自當如此辦理沿海  
民人居住海島久已安居樂業若遽飭令遷徙使瀕

海數十萬生民失其故業情殊可憫且恐地方官辦理不善張皇滋擾轉致漂流爲匪亦非善策所有沿海島除例應封禁者久已遵行外其餘均著仍舊居住免其驅逐至零星散處人戶僻處海隅地方官未必能逐加查察所云燒燬寮房移徙人口亦屬有名無實今各島聚落較多者已免驅逐此等零星小戶皆係貧民亦不忍獨令向隅而漁戶出洋採捕膏在海島搭寮棲止更不能概行禁絕且人戶旣少稽查無難尤非烟戶稠密之區易於藏奸者可比自應

金匱要略卷之二十三  
聽其居住毋庸焚燬所有沿海各省地方均著照舊  
辦理惟在各該督撫嚴飭沿海文武員弁實力稽察  
編列保甲如有盜匪混入及窩藏爲匪者一經查出  
卽將該犯所住寮房概行燒燬俾知儆懼其漁船出  
入口岸務期取結給照登記姓名倘漁船進口時藏  
有貨物形跡可疑既當嚴行盤詰無難立時拏獲地  
方官果能實力奉行認真稽察盜風自可永戢原不  
在多設條款競爲無益之舉言此欽此



稽查海島居民漁戶

一各省海島除例應封禁者不許民人漁戶築搭寮棚居住採捕外其居住多年不便驅逐之海島村墟及漁戶出洋採捕暫在海島搭寮棲止者責令沿海巡洋各員弁實力稽查毋致窩藏爲匪倘不嚴加稽查致海島居民及搭寮採捕之漁戶有引洋盜潛匿者將沿海巡洋各員並水師總兵提督分別嚴議如沿海巡洋各員知情賄縱與失察之水師總

兵提督各照例處分  
例載處分則  
例海禁門

山東海島居民

山東省海島居民除不准增添居屋外其現  
住居民令沿海各州縣並守口員弁實力巡  
察以靖海疆

浙江海島居民

一浙江省海島居民除不准增添居屋外其現住居民一律編甲稽查並責成該管鎮道於出洋之時嚴密查察毋使稍有容留仍於年底查明有無增添專摺具奏

外海捕盜著績給與軍功加級紀錄

嘉慶十年八月內奉

諭本日兵部議敘總兵羅江太等拏獲盜船一案已  
降旨照軍功給與加級紀錄矣外省海疆地方官員  
出洋巡哨擒捕盜匪與帶兵打仗無異其被戕者既  
照陣亡例賜卹遇有奮勉出力之員自應一體優加  
甄敘嗣後閩粵等省官員有在外海捕盜著有績  
特旨交部議敘者該部覈議時均著給與軍功加級  
紀錄以示獎勵欽此

拏獲海洋盜犯分別議敘

一副將以下官員拏獲隣境海洋及內河陸路  
疊劫盜犯罪應斬梟斬決數至三名以上該  
總督巡撫將該員本任內有無未獲盜犯案  
件查明報部察覈如本任內有未獲盜案例  
准抵銷如無承緝逃盜並雖有未獲逃盜係  
接緝再接緝者無論實缺候補人員俱准該  
總督巡撫奏請送部引

見恭候

欽定如所獲實係重犯罪應凌遲者卽拏獲一二名  
亦准該總督巡撫奏請送部引

見倘所獲斬梟斬決等犯未及三名按其罪名分別  
議敘罪應斬梟斬決者照拏獲隣境首盜例  
每名加一級係絞罪以下者照拏獲隣境盜  
犯例按其首從分別議敘

例載緝捕門

至總兵果

能留心緝捕首先拏獲盜犯覈與副將以下  
等官引

見之例相符者准其給與加一級其與引

見之例不符者仍照拏獲夥盜例每名給與紀錄  
次若係督同屬員協拏者仍毋庸給與議敘  
一拏獲隣境盜犯例應引

見該督撫聲請議敘者由部查覈合例卽題請送部  
引

見

一地方武職拏獲各項緊要人犯欽奉

特旨送部引

見到部時另有革職留任



特旨限年開復並

特旨不准陞用等項事故者於帶領引

見摺內聲明恭候

欽定

水師官員拏獲盜犯抵銷本任承緝處分

一閩浙江南廣東山東水師武職各員任內有承緝洋盜未獲案件應得處分如能於隣境失事未經拏獲之案及本轄洋汛從前失事未獲之案將盜犯全獲或拏獲及半一案無論人數多寡均准其抵銷本任承緝一案處分若所獲之犯不能灼知其爲隣境本汛以及全獲獲半者卽以獲犯多寡定其功績等差拏獲盜犯十名者准其抵銷本任承緝一

案處分二十名者准其抵銷本任承緝二案處分再有多者以次遞加若本身並無承緝盜案能獲隣境盜犯一案者准其送部引

見如拏獲隣境盜犯未能及半只准按名議敘不准送部引

見倘有捏報拏獲及以少爲多報部請抵別經發覺

將本員叅革提問轉報之提督總兵接其知

情失察分別議處

例載處分則例巡洋門

總督巡撫交

吏部議處

水師官員緝獲盜犯議敘

一 各省外海水師將弁按照巡期親歷各處實力巡哨遇有失事若於巡期內將本境應行緝捕之犯能於疎防限內拏獲及半者免其議處全行拏獲者准其加一級疎防限外全行拏獲者准其紀錄二次

巡哨官員獲犯議敘

一巡哨期內本汛並無失事而別能拏獲奸船  
一隻者將專汛分巡委巡兼轄各官紀錄一  
次拏獲二隻者將總巡統巡各官紀錄一次  
專汛分巡委巡兼轄各官紀錄二次如有多  
者照數遞加

水師官員停止開復

嘉慶五年六月內奉

旨兵部具奏議覆王德聲請開復水師人員一摺所有  
已革遊擊蔡得耀守備陳寶貴降調千總胡朝選已  
革把總黃炳志黃飛熊等五員均著加恩降一等補  
用不必送部引見至海洋處分從前本係二叅爲期  
較迫嗣經兵部按照陸路設有墩鋪之例改爲四叅  
期限已寬若仍照二叅不獲之例聲請開復則水師  
員弁勢必無所顧忌轉致緝捕懈弛殊非整飭海疆

之道所請四參開復之處著照部議停止摺併發欽

此